

STATEN A ACEPTA CAMBIO DI STATUUT

ORANJESTAD(AAN)—Diasabramainta Staten di Antillas a bini hunto pa trata e concepto di ley pa acepta e cambionan introduci den Statuut pa Staten Generaal di Hulanda.

Staten a bay di acuerdo cu e ley, manera a keda estableci pa votacion.

Comoquiera cu tabata trata di un momento historico, ta interesante pa menciona cu di parti di MEP cinco miembro di fraccion a duna sosten na e aceptacion di e cambio, cu a keda aproba tambe pa e representante di AVP. "Pro" a keda pronuncia tambe pa e fracionnan di DP, NVP, MAN y e Inde-

pendiente Roy Markes di Curacao, mientras cu Victor Minguel, cu a inicia e lucha pa municipalidad di Banda Bao na Curacao a vota contra.

Bob Lopez Henriquez, Independiente, y Benny Nisbet di PPA a bandona sala y no a vota. E actitud di Lopez Henriquez a wordo spera, pero Nisbet

mas bien a anuncia cu e lo a vota contra, manera el a pidi Eerste Kamer tambe pa haci.

E aceptacion di e cambio tabata rekeri un dos tercera parti di e miembronan presente di Parlamento y comoquiera cu DP di Isla Ariba y e representante di UPB di

Bonaire no tabata presente e ley a keda acepta cu e margen amplio di 17 pro y uno contra.

Ta e intencion pa e siman aki, Consejo Insular di Aruba trata e cambio di ley. Den Parlamento di Aruba tambe un dos tercera parti di esnan presente ta rekeri.

STATEN A HABRI PORTA PA SHELL

Cambio areglo fiscal y reduccion sueldo personal

ORANJESTAD(AAN)—Como excepcion grandi, Diadomingo tabata dia di reunion di Staten di Antillas cu a habri caminda pa Shell por keda Curacao.

Dos punto di agenda pa e reunion di Staten tabata regarda justamente e exigencianan di Shell, esta eliminacion di drem-pelbelasting y reduccion di sueldonan di trahadornan. E drem-pelbelasting ta

encera, cu registrando perdida o ganashi, Shell mester paga belasting di ganashi a base di un suma estipula. Algo cu no ta justo segun e compania cu e pone eliminacion di e ley ariba su lista di exigencianan.

Shell a muestra cu registrando perdida e no por carga gasto di un belasting ariba ganashi cu e no ta registrando. Un asunto pues di injusticia, cu a

wordo coregi pa Parlamento cu a considera cu tabata trata di algo justifica.

Sinembargo e miembronan di Parlamento a tene un palo tras di porta. E ley unicamente lo dreña na vigor ora tin seguridad cu Shell no ta bay, pa asina evita manipulacion.

Tabata laat Diasabra anochi cu a keda decidi cu e ultimo punto ariba agenda, esta e reduccion di sueldonan di personal di

Shell, mester spera te e otro dia pa mira si e trahadornan y e gerencia di Shell, cu bao di guia di e Ministro Chance tabata reuniendo, por a yega na un areglo voluntario.

Diadomingo atardi a resulta cu mester a continua reunion sin cu un areglo a wordo logra na mesa di negociacion.

Pendiente e posibilidad di e areglo voluntario a cuminsa reuni pa 5 or di

Diadomingo atardi, pero pa madrugada di ayera a resulta cu no ta posible pa na mesa di negociacion e asunto keda regla. Pesey Staten a introduci e areglo legal pa reduci e salario di trahadornan di Shell, manera e compania a pidi, mientras a bisa Gobierno cu na momento cu yega na un areglo voluntario entre trahador y compania, lo declara e ley revoca.

MOCION DI STATEN ENCUANTO FECHA INDEPENDENCIA ACEPTA

ORANJESTAD(AAN)—Na un forma general, Staten di Antillas a uni su mes cu e mocion presenta pa e fracionnan di Aruba den Staten.

Tabata trata di un mocion, cu a keda presenta durante tratamiento di puntonan rela-

cional cu futuro estatal, esta cambio di Statuut, y cu mester habri caminda pa den futuro por cambia e fecha di Statuut.

E contenido di e mocion ta base ariba e opinion cu deseonan di pueblo di Aruba, esta di tur partido representa den

Parlamento di Aruba encuan-to fijamento di fecha di independencia, mester wordo respecta.

Esaki pues ta un

mocion cu lo haya importancia mayor na momento cu mester bay evalua e fecha di independencia, cu no por wordo cambia uni-


lateralmente pa Aruba, manera Hulanda a bisa, pero solamente den forma di cooperacion entre tur e partnernan den Reino.

STATEN NO POR A TRATA ASUNTO DI POLIS AYERA

ORANJESTAD(AAN)—Tabata e intencion pa Staten di Antillas a reuni ayera den comision central pa hunto cu e Ministeronan di Justicia, di preparacion di Status Aparte di Aruba y di Estructura Estatal di Antillas di Cinco, trata e desaroyonan den seno di Cuerpo Policial.

En vista di e desaroyonan den seno di e Parlamento, cu a reuni te 4.30 or di ayeramadruga, no por a tene e reunion cu tabata planea pa ayeramainta 10 or.

Awor un fecha nobo mester wordo fija, aunke no ta wordo pensa cu e siman aki lo ta posible.



Diadomingo atardi pa 37 mucha di Arubanita Kleuterschool a yega e gran momento di despedida. For di man di Zuster Graciela nan a ricibi nan certificado di "graduacion" pa asina nan por cuminsa e aña escolar nobo na un school basico. Mientras Zuster Graciela a desea e muchanan hopi exito, nan a gradicie pa e aña-nan cu el a dedica na nan na Kleuterschool.